

V c
2034



h. 20



h. 20, 44. Q. 20 (49)

V c
2034

Ein Lied für die Landknecht gemacht.

In diesen Kriegsleufften
nützlich zu singen.

Im Denmarcker / oder im
Schweitzer thon.

Wense Augusto.

An. M. D. XLVI.

Faint handwritten text, possibly a library stamp or signature.



208 7
1000 05 20

Ach Karle groß mechtiger Man/
Wie hast ein Spiel gefangen an/
On not/inn Teutschen landern:
Wolt Got/du hest es bas bedacht/
Dich solchs nicht vnterstanden
Erstanden.

Du hast zuuor mit grossen lob/
Teutsch Land beschützt/vnd ghalten drob
Das Friden würd erhalten/
Wierols schwer war/weil Stedt vnd Land
Der Lehr halb warn gespaltten
Gespaltten.

Nun aber solches vngeacht/
Hast Teutsch Land vnruwig gemacht/
Wilt mit gewalt vnd waffen/
Die tewren Fürsten Hochgepott/
Sachsen vnd Hessen straffen
Ja straffen.

Was haben denn die beyd verschuldt/
Das du nicht tragen kanst gedult/
Vnd must all Land erregen/
Gleych ob dir züg der Türckisch feindt/
Mit ganzer macht entgegen:
Entgegen.

Vnd fürst darzu inn Teutsche Land/
Ein mörderisch volck/vol aller schand/
Welchs du doch hast verschworen/
Da du durch Hertzog Fridrichs gunst
Zum Keyser bist erkoren
Erkoren.

Du klagst jr Vngehorsam an/
Han sie dir doch stets volg gethan/
Inn all billichen sachen



Drümb kanstu diese Fürsten werdt
Dis fals nicht strefflich machen

Ja machen.

Drümb ist es nür ein blosser schein/
Damit die sach muß gferbet sein/
Es steckt was sonst dahinden/
Gots reynes Wort wilt leschen auß
Wie man gwoiß thut befinden

Befinden.

Dem Papst du wilt gehorsam sein/
Der dir solchs lang hat gossen ein/
Villich mit Eyd verbunden/
Als er die Kron dir setzet auff
Wie man wol würdt erkunden

Erkunden.

Der schickt yetzt Volck vnd grosses gut/
Mit Zusag auch dir macht ein mut/
Das du getrost solt streyten/
Wider die Luthrisch Ketzerey
Vnd solst nicht lenger beytten

Ja beytten.

Denn der Papst dis sehr wol versteht/
Das/on dein schutz sein Keych zergeht/
Sein Macht kan solchs nicht wehren/
Gotts Wort sicht er stets weyter gehn
Will ihm sein Keych verheren

Verheren.

Drümb sucht ers bey dir/wie er kan/
Dis schrecklich feur zu zünden an/
Durch dich / im Teutschen Landen/
Du solt dein macht all setzen dran/
Zu schützen seine schanden

Ja schanden

A ij

Ach Karle/sich dich besser für/
Bedenck was draus erfolgen wür/
Wenn du dem Papst zu gefallen
Solch greulich Mordt würst richten an/
Im diesen Landen allen

Ja allen.

Teutsch Nation dein Vaterlandt/
Des trew gen dir ist oft erkandt/
Würst werffen inn ein hauffen/
All Kirchen/zucht/vnd Regiment/
Müst gar im blüt ersauffen

Ersauffen.

Das sücht der Römisch Antichrist/
Wie dann sein alt gewonheyt ist/
Solch greulich Mord zu stifften/
Erregen Krieg/vnd zwitteracht groß/
Die hertzen zu vergifften

Vergifften.

Gedenck zu rück du weyser Man/
Vnd sich der Papst groß schalckheit an/
Wie oft durch sie ist kummen/
Das jemerlich Teutsch Nation/
Im blut hat gar geschwummen

Geschwummen.

Der Erzböswicht Papst Hildebrandt/
Erregt groß Krieg inn Teutchem Landt/
Keyser Heinrich zu vertreiben/
Vnd hetzt an ihn viel Fürsten starck/
Im Bann must er stets bleiben

Ja bleiben.

Die ursach dieser Feindschafft war/
Das der Papst nicht wolt leyden gar/
Das man ein Papst solt machen/

Mits Keyfers gunst vnd willigung/
Drob huben sich die sachen

Ja sachen.

Der Papst zum Keyser welen lies/
Ein Fürsten der Rudolphus hies/
Ein Kron thet er im senden/
Gebot den Fürsten all zu gleych/
Von Heinrich sich zuwenden

Zu wenden.

Do ward vergossen grosses blüt/
Als sich schützet der Keyser gut/
Vnd hat Rudolff verloren/
Die Schlacht/zu sampt der rechten handt/
Damit er hat geschworen

Geschworen.

Noch kundt der Selbrandt feyren nicht/
Des Keyfers Son er auch anricht/
Sein Vater zu verriagen/
Nürnberg darob zerrissen wardt/
Vnd sehr groß volck erschlagen

Erschlagen.

Nachs Vaters todt den Son anfacht/
Ein ander Papst mit gleicher macht/
Thet Fürsten an ihn hetzen/
Die dorfften sich mit Heeres krafft
Wider den Keyser setzen

Ja setzen.

Bey Mansfeldt geschach ein grosse schlacht/
Vnd wurd der Keyser müd gemacht/
Dorfft sich nicht weyter legen
Wider den Papst/der stets solch mord/
Im Teutsch Landt thet erregen

Erregen.

2 11

Hernach den Keyser Friderich
Ein Gottlos Papst ganz lesterlich
Mit füssen hat getretten/
Als er nach langen Krieg den Papst
Umb gnaden hat gebeten

Gebeten.

Des selben Fridrichs ganzer stam
Durch die Papst inn gros jammer kam/
Vnd ist Teutsch macht zerrissen/
Allzeyt durch der Papst büberey/
Der sie sich han geflissen

Geflissen.

So sich nun dise kläglich Geschicht/
O Karle gros / bewegen nicht/
Dich vor dem Papst zu hüten
Der durch dein macht außgiessen will/
Auff vns sein grim vnd wüten

Ja wüten.

Dadurch sein gros Abgötterey/
Sein Diebstal/schandt/vnd Sodomey/
Durch dich müg sicher bleyben/
Vnd er hernach die reyne Lehr/
Auff Teutschem Land mög vertreyben

Vertreyben.

So muß wir solchs befehlen Got/
Dem wir auch klagen vnser not/
Mit seuffzen vnd mit beten/
Vnd schreyen zu ihm hertziglich/
Er wöll sein Wort vertretten

Vertretten.

Villeicht lohnt dir der Papst auch gleych/
Wie er denn offte hat than im Reych/
Die für ihn han gestritten/

Dieselb hernach von Päpsten all
Viel arges han erlitten

Erlitten.

Wir hoffen/ Got/ mit starcker hut/
Werd schützen das vnschuldig blut/
Der armen Weyb vnd Kinden/
Die ihn durch Christum ruffen an/
Werden gwis Gnad befinden

Befinden.

Er wirdt der frommen Priester hauff
Verschonen auch in disem lauff/
Die trewlich han geleret/
War Gots erkentnuß/ vnd Gebet/
Die Christlich Kirch gemehret

Gemehret.

Er wirdt auch vnser Herrschafft werdt/
Die der Lehr halb ist hoch beschwerdt/
Darsetzt ihr leyb vnd leben/
On zweyffel schützen gnedigklich/
Vnd/ trost/ sterck/ radt/ sieg/ geben

Ja geben.

Daneben woll wir Landknecht gut/
Dran wagen vnser Leyb vnd Blüt/
Zu schutz der Kirch vnd Landen/
Danim Gots Wort wirdt rein gelehrt/
Do auch noch zucht verhanden

Verhanden.

Wider des Papsts Abgötterey
Vnd der Spanier Mörderey/
Beyder vnzucht vnd Rauben/
Die erger denn die Türcken sind/
Das mag man gwislich glauben

Ja glauben.

AK 2034

Drümb seit getrost jr frommen Knecht/
Fürs Vatterlandt nür manlich fecht/
Welchs yetzt der Bapst wil stecken/
Durchs Keyfers gwalt inn schwere not/
Last euch jr Macht nicht schrecken

Ja schrecken.

Mir haben auch auff vnser seydt/
Ein starcken Heldt der für Vns streyt/
Von macht ist nicht seins gleychen/
Gots ewig Son/mit seinem Heer
Dem muß all gwalt entweichen

Ja weichen.

Dif Liedlein ist inn eyl gemacht/
Ein jungen Landfknecht wol geacht
Zu freundlichem gefallen/
Von einem/der wünscht glück vnd heyl/
Stummen Landfknechten allen

Ja allen.

Ende.


ULB Halle

3

000 998 206



ML



OK. 20 (49)

Ein Lied für die
Landsknecht
gemacht.

Inn diesen Kriegsleufften
nützlich zu singen.

Im Denmarcker/ oder im
Schweitzer thon.

Wense Augusto.

An. M. D. XLVI.

